

2014-imut Ilassutitut aningaasaliissutissanut inatsisissatut siunnersuut

(Aningaasaqarnermut Nunamullu Namminermut Naalakkersuisoq)

Akissuteqaat

(Aningaasaqarnermut Nunamullu Namminermut Naalakkersuisoq)

Aappassaaneerpeqarnera

2014-imut ilassutitut aningaasaliissutissanut inatsisissatut siunnersuutip siullermeerneqarnerata kingorna ataatsimiititaliami oqaluuserineqarnera pillugu Aningaasaqarnermut Akileraartarnermullu Ataatsimiititaliaq qutsavigissavara. Aningaasaqarnermut Akileraartarnermullu Ataatsimiititaliap isumaliutissiissutaani pineqartuni immikkoortut ataasiakkaarlugit oqaaseqarfigissavakka.

Aningaasaqarnermut Akileraartarnermullu Ataatsimiititaliap isumaliutissiissummini erseqqissaatigaa, konto pingaarnermut 73.94.02-mut, Nukissiorfiit, tunngatillugu IA-mi suliaq nr. 14-654-imut oqaasertaliussatut akuersissutigineqartut '2014-imut Ilassutitut aningaasaliissutissanut inatsisissatut siunnersuummut' ilanngunneqarsimanngitsut. Aningaasaqarnermut Akileraartarnermullu Ataatsimiititaliaq tassani eqqortuliorpoq, taamaammat maanna aappassaaneerinnilluni suliaqarnissamut allannguutissatut siunnersuut oqaasertaliussamik ilanngusseqquisoq Naalakkersuisut saqqummiuppaat.

Ilanngullugu Aningaasaqarnermut Akileraartarnermullu Ataatsimiititaliap paaserusuppaat atuarfintut tunngasutigut sanaartortitsisarnerup kommuninut tunniunneqarnissaa pillugu suliaq Naalakkersuisut ingerlateqqissimaneraat. Tassunga atatillugu ilisimatitsissutigissavara, suleqatigiissitaq Namminersorlutik Oqartussanit kommuninillu peqataaffigineqartoq pilersinneqarmat, suleqatigiissitap suliaq maanna misissoruttulerpaa. Tamatumunnga ilaatigut ilaavoq atuarfiit illutaasa tamarmiusut qanoq issusiannik nalilersuinissaq. Assersuutigalugu illuutit aserfallassimanerannik siunertamullu atorneqarsinnaanerannik nalilersuisoqassaaq. Nunami tamarmi atuarfiit illutaasa qanoq innerannik nalilersuilluni suliaq annertummat naatsorsuutigineqarpoq suliaq august 2016-imi aatsaat naammassineqassasoq.

Atuarfintut tunngasutigut sanaartugassat kommuninut tunniunneqarneranni isumaqatigiissutigineqarsinnaavoq suliaq isumagineqarnissaanut kommunit qanoq atuisimatiginerannik ingerlaavartumik malitseqartitsisarnissaq. Suliaqarfiulli tunniunneqarnerani nalinginnaasumik ingerlatsinissaq salliutillugu suliaqarfik salliutikkunnaarneqarsinnaavoq. Tassunga atatillugu innersuussutigineqarpoq kommunit ilaanni sanaartornissamut aningaasassat ullumikkut annikitsuaraanerat. Aammattaaq apeqqutaavoq atuarfintut sanaartornemi taamak angitigisuni kommunit naammattunik sulisussaqaarnersut.

Naggasiullugu Aningaasaqarnermut Akileraartarnernullu Ataatsimiititaliap apeqqutigaa suleqatigiissitami qanoq ingerlasoqarnerseq, konto pingaarnerup 87.75.03-p, Kommunini avatangiisinut atortunut tapiissutit, ataani anartarfiit ungalussaannut nutaamut aamma eqqaavissuarnik iluarsaassinissamut 44,5 mio. kr.-t aningaasaliissutigineqarnerannut atatillugu suleqatigiissitaq pilersinneqarpoq. Tassunga atatillugu ilisimatitsissutigissavara suleqatigiissitaq Pinnngortitamut, Avatangiisinut Inatsisinillu Atuutsitsineranut Naalakkersuisoqarfimmit aqunneqartoq pilersinneqarmat, ilaatigullu KANUKOKA-mit, Nakorsaaneqarfimmit aamma Kalaallit Nunaanni Uumasunut nakorsaqaarnikkut Inuussutissalerinermilu Oqartussanit peqataatitaqarluni. Oqartussaasutut peqataasut anartarfilinerup iluani ajornartorsiutitut isigisaat, taakkununga ilanngullugit eqqiluittuunermi pissutsit aamma nappaatinik siammarterisinnaasut suleqatigiissitami qulaajarneqaleruttorput.

Taamatut oqaaseqarlunga Naalakkersuisut 2014-imut Ilasutitut aningaasaliissutissanut inatsisissatut siunnersuutaat Inatsisartuni aappassaaneerlugu suliarineqartussanngortippara.